

Codex Laureshamensis Teil: Bd. 1, Einleitung, Regesten, Chronik Kap. Nr. 61

Post Luodowicum Karolus occidentale regnum adeptus est. Nam antea Galliarum populus cum consensu Arnolfi imperatoris, incursu crebro Northmannorum compulsus, Udonem ducem regem aelegit, qui eis contra Northmannos propugnator indefessus exstitit, atque ita deinceps ab hoc regno Galliarum facta discessio est. Udone mortuo successit Karolus. In horum Karolorum decessu, in utriusque regni fastigio Karolorum illa celsa progenies facta est de medio, quae a primo anno Pippini regis Francorum usque ad obitum istorum, in regia dignitate claruit annis centum septuaginta tribus. Cuonradus uero frater Eberhardi Marchionis orientalis regni partem circa Renum tenuit, qui etiam laureshamensi monasterio libertatis et immunitatis privilegium contulit.